

Kontuola

ANTZUOLA / Egubakoitza / 2002ko azaroaren 22a / 135. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02


Simon eta Kaxiano omenduko dituzte, Santa Zezilia Eguna dela eta

AINTZANE IRIZAR

Gaur, egubakoitza, Santa Zezilia Eguna dela eta, Simon Artolazabal eta Kaxiano Iburguren musikariak omenduko dituzte oraingo asteburuan. Bihar, zapatua, musika emanaldia izango da, parrokian. Bi musikarien gaineko erakusketa ere jarriko dute.

Simoni eta Kaxianori egingo dieten omenaldiaren ekitaldi nagusia bihar, zapatua, izango da, Antzuolako parrokian, 18:00etan. Musika emanaldia egingo dute hantxe, musikari biak omentzeko. Herriko taldeek parte hartuko dute emanaldi horretan, honako hauek, hain zuzen ere: txistulari taldeak, bertsolari taldeak, Musika Eskolako umeeak, abesbatzak eta Oinarin dantza taldeak; Antzuolako Udalak ere parte hartu du omenaldia antolatzen. Omenaldia bukatutakoan, gaztaina erre jana izango da, urtero bezala, herriko plazan.

Baina musika emanaldi hori ez da omenaldiko ekitaldi bakarra izango; izan ere, bi musikarien gaineko erakusketa jarriko dute Olaran etxean bihar, zapatua, eta domekan. Simonen eta



Ezkerraldean, Simon Artolazabal eta eskuinaldean, Kaxiano Iburguren.

Kaxianoren ehunetik gora argazki ikusteko aukera izango dugu, baita haiek erabili izandako hainbat material ere.

Erakusketa horrekin batera, ezusteko txiki bat ere prestatu dute antolatzaileek; ezusteko hori

ikusteko, hortaz, erakusketara joan behar. Goizez, 12:00etatik 14:00etara egongo da zabalik erakusketa; zapatu arratsaldean, omenaldiaren ostetik 21:00ak arte egongo da zabalik, eta domekan, 19:00etatik 20:30era.

2002. URTEAN HIL DIRA BIAK

Simon otsailean hil zitzaigun; Kaxiano Iburguren, berriz, urtarilean. Bi hilabeteren barruan, hortaz, herriko bi musikari handi galdu zituen Antzuolak, eta orain, omenaldia egingo diete.

Sagastirako transformadorea

Duela pare bat aste eman dizkiete giltzak eskola osteko etxebizitzetako jabeei; Antzuola Udal Etxegintzako hirugarren etxebizitza multzoa ere hasi dira eraikitzen, eta Buztinzuriko etxebizitzetako lanak ere aurrera doaz.

Horren ondorioz, argindar eskaera gero eta handiagoa denez, transformadore berria jarri behar izan du Udalak Sagasti auzoan. Astelehenean jarri zuten transformadorea, eta hura jartzeko, errepidea itxi egin behar izan zuten./A.I.

LABUR

Ordenantza fiskal berriak onartu ditu Antzuolako Udalak

Datorren urtean, ordenantza fiskal berriak indarrean jarriko ditu Udalak, azkeneko osoko bilkuran onartu zutenaren arabera. Zerga hauei dagozkien ordenantzak aldaketu dituzte: ondasun higiezinaren gainekoa, ekonomia jardueren gainekoa, trakzio mekanikoko ibilgailuena, zerbitzuak eskaini eta jarduerak burutzeagatik ezarritako daudenak eta jabari publikoaren erabilera pribatu eta aprobezkoaren bereziagatik ordaindu beharrekoak. Salbuespenak salbuespen, %4 igoko dira zergok.

Aurrera doaz Olaran inguruko urbanizazio lanak

Aurtengo otsailaren 5ean inauguratu zuten Olaran etxea, baina inguruko urbanizazio lanak egiteko denbora luzeagoa behar izan dute. Dena dela, aurrera doaz lan horiek; azkeneko astean, esate baterako, etxearen ingurua txukuntzen ari direla ikusi dugu.

Lurra ekarri eta lorategia izango dena prestatzen ari dira Udaleko arduradunak. Horrela, poliki-poliki dotore geratzen ari da Olaran bera, baita inguruak ere.

Domekako zinema emanaldia bertan behera laga dute

Oraingo aste bukaeran ez da zinema emanaldirik egongo Olaran etxean. Izan ere, Kaxianori eta Simoni egingo dieten omenaldiaren barruan, erakusketa jarriko dute Olaranen, eta areto biak erabiliko dituzte erakusketa horretarako.

Hurrengo domekan helduko diete berriro emanaldiei, eta Spiderman filma eskainiko dute, betiko moduan, 16:30ean.





Hasi dute informatika ikastaroa

Herriko erretiratuek hasi dute dagoeneko informatika ikastaroa. Astelehenean, hilak 18, hasi zuten Udaleko Gizarte Ongizateko Sailak antolatutako ikastaro hori. Astelehen, eguazten eta egubakoitz arratsaldero izango dituzte eskolak, bi orduz egunean.

Momentuz, ordenadoreak pixka bat ezagutzen eta Windows eta Word programak erabiltzen ikasiko dute ikastaroan parte hartzen duten ikasleek./A.I.

KIROLA

Gazteen futbol taldekoak fin ari dira aurtengo denboraldian

AINTZANE IRIZAR

Azkeneko partidua 3-2 galdu duten arren, ondo hasi dute denboraldia futboleko gazteenek. Iaz, ezin izan zioten eutsi lehenengo mailari, baina, aurtengoa hobeto ari dira. Hirugarren tokian dago taldea sailkapenean, bederatzia partidutik sei irabazita.

Hasiera ona eman dio gazteen futbol taldeak aurtengo denboraldiari. Bere taldean, hirugarren tokian dago momentu honetan, 18 punturekin, Aretxabaleta Almen liderrak baino lau puntu gutxiagorekin. Eibartarrak taldea, berriz, bigarren tokian dago, 19 punturekin.

Hirugarren tokian egon arren, gainera, bere taldean gol gehien sartu dituen taldea ere bada Antzuolako; bederatzia partidutan 29 gol sartu dituzte antzuolarrak, eta 13 besterik ez dituzte jaso.

Horrela jokatzeko jarraitzen baldin badute, berriro lehen mailara igotzeko aukera ere izan dezakete, horixe baita eurek nahi dutena.



Hirugarren postuan dago gazteen taldea, liderrarengandik lau puntura.

ERREGIONALAK, ESKAS

Bigarren erregionaleko taldea ez dabil gazteen taldea bezain ondo aurtengo denboraldian. Bere taldean, bederatzigarren postuan dago; kontuan hartu behar dugu hamaika talde daudela. Lau puntu besterik ez dituzte antzuola-

rrek; Amaiak Bat taldeko liderrak, berriz, hemeretzi puntu dauzka.

Jokatu dituzten zazpi partiduetatik bat besterik ez dute irabazi, bost galdu eta beste bat berdindu dute. Dena dela, partidu bat jokatzeko daukate oraindik.

HERRITARREN HITZA / Gerbasio Legorburu · Txistularia

Kantu zaletasuna

Musika eskolek lan ederra egiten dute herri askotan. Aukera onak daude solfeo eta hainbat instrumentu jotzen ikasteko. Alde horretatik, ez daukagu kezkatzeko motiborik. Hala ere, Antzuola bezalako herri baten, ikusita kanturako zaletasuna zelakoa izan den, eta zaletasun horrek pertsonari ematen dion alaitasuna, mereziko luke zerbait antolatzea herrian, zaletasun horri erantzuteko.

Bi zailtasun ikusten ditut asmo hori bideratzeko. Bata, horretarako prest egongo litzatekeen irakasle baten premia, jakin badakigulako

gure inguruetan ez daukagula aukera askorik. Bigarren kezka da umeak zela bideratu horretara, ezertarako denborarik gabe dabilzala ikusita. Komenigarria litzateke solfeo jakitea, baina ez derrigorrezkoa, ezta gutxiagorik ere. Kantu zaletasunak, nonahi kantatzeko ohitura duenak, berarekin darama halako poz jario edo alaitasun ikutua, eta nik uste dut merezi duela hau aurrera eramateko zerbait



"Kanturako zaletasun handia egon da herrian"

egitea. Orain, Simoni eta Kaxiano Erautzako itsuari omenaldia egitera goazen honetan, merezi du euren gaineko zerbait adieraztea. Simonek solfeo irakatsi zien herrian nahi izan zuten guztiei, eta ez nolana irakatsi ere. Garai hartan, Antzuolako kantoriek, asko izateaz gain, oso ondo abesten zuten, batez ere, elizako koroan abesten zutenek. Solfeo ikastearekin batera, koroan

tiple moduan jarduten zuten; entsegu asko egiten zen urtean zehar eta oso trebatuta irtetzen ziren. 56 urtetan egin zuen lan hau Simonek, eta beste hainbeste urtean izan zen organista parrokiari. Kaxianori ez behar baten ondorioz tokatu zitzaion soinua ikastea, itsu gelditu zen eta. Soinua joz ibili zen herriz herri. Kantari bezala jarraitu zuen gero, eta haren alaitasuna eta kantu berriak jartzeko zuen abildadea hor gelditu dira betiko. Antzuolarroi dagokigunez, azpimarratzekoa da nonahi eta agertzen zuen bere jaioterriari zion maitasuna. Goian izan dezatela atseden biek.

KIROLA

PARTIDUAK

FUTBOLA

Azaroak 23
15:45: Antzuola-Gazteak (2. erreg.)

PILOTA

Gipuzkoako Kluben Arteko Txapelketako partidua kanpoan jokatu dituzte


EMAITZAK

FUTBOLA

Urki 5 Antzuola 0 (2. erreg.)
Urki 3 Antzuola 2 (Gazteak)

PILOTA

Gipuzkoako Kluben Arteko Txapelketa
Olalde-Oskarbi (infant. eskuz) . . . 18-6
Olalde-Landare (nag. paletaz) . . . 34-35



Zabalo Iturgintza S.L.

Bidea eginez

Tailerra: Uzarraga bidea, 10. Antzuola. Tf. 943 78 71 78
Erakusketa: Kalebarren, 1. Antzuola. Tf. 943 78 71 79, Tf. eta F. 943 76 64 73

- Gasa
- Berogailuak
- Haire egokitua
- Enpresen mantenimendua
- Lurrun instalazioak
- Bero-aurrezteak
- Bainugelak. Proiektuak momentuan DIBaren bidez
- Birgaitze-espeditentak bideratzen ditugu



Juan Cruz

ARGAZKIAK

Ezkontza erreportaiak
Jaunartze erreportaiak
Momentuko argazkiak

BITXITEGIA

Marrokineria
Erlojuak, Bitxiak
Opari gaiak

Herriko plaza 4. Tel. 943 78 70 66. ANTZUOLA